



DASAR MOBILITI PELAJAR UNIVERSITI TUN HUSSEIN ONN MALAYSIA

1.0 TUJUAN

Dasar Mobiliti Pelajar Universiti Tun Hussein Onn Malaysia (UTHM) bertujuan untuk menetapkan kerangka strategik bagi pelaksanaan dan pengurusan program mobiliti pelajar yang melibatkan kerjasama antara UTHM dan institusi pendidikan di peringkat nasional dan antarabangsa.

2.0 DEFINISI

Dalam dasar ini,

- 2.1 **Program Mobiliti** adalah program yang melibatkan pergerakan pelajar dari UTHM ke Institut Pengajian Tinggi (IPT) lain, atau pelajar dari IPT lain ke UTHM.
- 2.2 **Program Mobiliti Berkredit** adalah Program Mobiliti yang melibatkan pelajar mendaftar sekurang-kurangnya 1 kursus bernilai 1 jam kredit di IPT yang menerima pelajar tersebut.
- 2.3 **Program Mobiliti Tidak Berkredit** adalah Program Mobiliti yang tidak memerlukan pelajar mendaftar sebarang kursus di IPT yang menerima pelajar tersebut.
- 2.4 **Program Mobiliti *Inbound*** adalah program kemasukan pelajar prasiswazah dan pascasiswazah dari IPT lain ke UTHM.
- 2.5 **Program Mobiliti *Outbound*** adalah program kemasukan pelajar prasiswazah dan pascasiswazah UTHM ke IPT lain.
- 2.6 **Program Mobiliti Fizikal** adalah Program Mobiliti yang dianjurkan dan dilaksanakan secara hadir fizikal di IPT yang menerima pelajar.
- 2.7 **Program Mobiliti Maya** adalah Program Mobiliti yang diadakan secara dalam talian.
- 2.8 **Program Pelancongan Pendidikan atau *Edutourism*** adalah satu jenis Program Mobiliti yang ditakrifkan sebagai aktiviti pelancongan oleh seseorang yang melakukan lawatan ke Malaysia di mana proses pendidikan dan pembelajaran di IPT Malaysia merupakan aktiviti utama dalam lawatan mereka. Program ini melibatkan kemasukan pelajar atau pelancong luar negara yang bermalam sekurang-kurangnya semalaman di negara ini untuk mengikuti program *Edutourism* di IPT Malaysia dalam

tempoh masa yang tidak kurang dari lapan (8) jam hingga enam (6) bulan.

- 2.9 **Program Mobiliti Teradun** adalah Program Mobiliti yang memerlukan semua pelajar menghadiri sebahagian daripada program tersebut secara fizikal dan sebahagian lagi secara dalam talian.
- 2.10 **Program Mobiliti Hibrid** adalah Program Mobiliti yang dihadiri oleh sebahagian pelajar secara fizikal dan sebahagian lagi secara maya pada waktu yang sama.
- 2.11 **Institusi Pengajian Tinggi (IPT)** adalah mana-mana Universiti Awam (UA) / Swasta (IPTS) atau lain-lain organisasi yang menawarkan program akademik yang diiktiraf oleh badan berkuasa atau badan kelayakan yang diiktiraf oleh Kerajaan Malaysia.
- 2.12 **Pas Lawatan Sosial, PL(S)** adalah pas yang diperlukan oleh pelajar Program Mobiliti Fizikal dan pelajar program *Edutourism* dari luar negara dengan jangka masa tidak melebihi tiga (3) bulan atau berdasarkan kelayakan PL(S) mengikut negara masing-masing.
- 2.13 **Pas Pelajar** adalah pas yang diperlukan oleh pelajar Program Mobiliti Fizikal dan pelajar Program *Edutourism* dari luar negara dengan jangka masa melebihi tiga (3) bulan hingga dua belas (12) bulan atau untuk tempoh program yang melebihi kelayakan PL(S).
- 2.14 **Pas Lawatan (Ikhtisas) (PLIK)** adalah pas yang dikeluarkan kepada pelajar luar negara yang ingin menjalankan latihan praktikal/latihan industri/penyelidikan di industri dalam Malaysia.

3.0 PROGRAM MOBILITI

- 3.1 Program Mobiliti boleh melibatkan pergerakan dalam negara (tempatan) atau pergerakan luar negara (antarabangsa) sama ada secara *inbound* atau *outbound*. Program ini juga boleh dilaksanakan secara berkredit atau tidak berkredit, dan boleh dihadiri secara fizikal dan/atau secara dalam talian.

- 3.2 Tempoh masa Program Mobiliti adalah seperti berikut:

Jenis Mobiliti	Tempoh Masa	
	Jangka Pendek	Jangka Panjang
Program Mobiliti Tidak Berkredit	1 hari atau gabungan masa minimum 4 – 8 jam hingga 3 bulan	Melebihi 3 bulan hingga 12 bulan
Program Mobiliti Berkredit	1 minggu (sekurang-kurangnya 40 jam pembelajaran pelajar (<i>student learning time</i> , SLT)) dan mendaftar sekurang-kurangnya 1 kursus bernilai 1 jam kredit	

- 3.3 Program Mobiliti Berkredit adalah program yang melibatkan pelajar mendaftar sekurang-kurangnya 1 kursus bernilai 1 jam kredit di IPT yang menerima pelajar tersebut. Pelajar kemudiannya boleh memohon pemindahan kredit apabila pulang ke IPT asal mengikut syarat yang ditetapkan oleh IPT masing-masing.
- 3.4 Program Mobiliti Tidak Berkredit adalah program yang lazimnya bersifat lawatan, pertukaran budaya dan penambahan ilmu pengetahuan tanpa perlu mengikuti sebarang kursus di IPT penerima seperti *Summer School*. Pencapaian pelajar semasa mengikuti Program Mobiliti tersebut tidak akan diambil kira bagi penentuan kedudukan akademik pelajar. Walaubagaimanapun, program ini akan direkodkan di dalam transkrip aktiviti pelajar.

4.0 PELAJAR PROGRAM MOBILITI

- 4.1 Peserta Program Mobiliti terdiri daripada pelajar prasiswazah dan pascasiswazah yang memenuhi kriteria yang telah ditetapkan.
- 4.2 Surat tawaran perlu dikeluarkan kepada semua pelajar yang mengikuti Program Mobiliti, tanpa mengira jenis program.

5.0 PEGAWAI PENGIRING

- 5.1 Universiti boleh menyediakan Pegawai Pengiring bagi Program Mobiliti *Outbound* mengikut keperluan semasa.
- 5.2 Pegawai pengiring bertanggungjawab memastikan Program Mobiliti berjalan dengan lancar dan kebajikan pelajar adalah terjaga.
- 5.3 Tugas Pegawai Pengiring adalah tugas rasmi dan boleh membuat tuntutan yang berkaitan menggunakan peruntukan Tabung PTj/Peruntukan Mengurus PTj.

6.0 PERUNTUKAN KEWANGAN

- 6.1 UTHM boleh mempertimbangkan peruntukan kewangan kepada setiap pelajar dan pegawai pengiring Program Mobiliti *Outbound* berdasarkan kriteria seperti lokasi, jenis, aktiviti dan impak program tertakluk kepada agihan peruntukan pada tahun semasa.
- 6.2 UTHM boleh mempertimbangkan peruntukan kepada fakulti/pusat yang menerima pelajar Program Mobiliti *Inbound* bagi tujuan pengurusan pelajar, tertakluk kepada agihan peruntukan pada tahun semasa.

7.0 YURAN PENGURUSAN PROGRAM MOBILITI

- 7.1 Pelaksanaan program mobiliti pelajar memerlukan struktur yuran yang jelas bagi memastikan keberkesanan pengurusan dan kelestarian

program. Yuran dikenakan berdasarkan kos yang terlibat dalam pelaksanaan program.

- 7.2 Pelajar bertanggungjawab menanggung sendiri yuran yang dikenakan oleh institusi penerima bagi program mobiliti, jika ada.
- 7.3 Pengecualian yuran bagi Program Mobiliti *Inbound* boleh diberikan kepada pelajar mengikut MoU/MoA yang telah dipersetujui di antara UTHM dengan IPT luar.
- 7.4 Tiada pengecualian yuran bagi program jangka pendek (termasuk *summer programme, summer/winter school, summer/winter camp*, atau seumpamanya). Pengecualian yuran untuk program jangka pendek hanya boleh dipertimbangkan sekiranya berlaku pertukaran pelajar dua hala (*student exchange*) di antara UTHM dan IPT luar tersebut.
- 7.5 Kadar yuran yang dinyatakan tidak termasuk makanan, pengangkutan dan aktiviti luar kampus.

8.0 TABUNG MOBILITI

Setiap fakulti/pusat boleh memohon penubuhan Tabung Mobiliti atau lejer bagi kegunaan pembiayaan Program Mobiliti.

9.0 INSURANS & KEMUDAHAN PERUBATAN

Semua pelajar yang menyertai Program Mobiliti wajib mempunyai perlindungan insurans dan perlu membuat pemeriksaan kesihatan di mana-mana hospital kerajaan atau Pusat Kesihatan Universiti tertakluk kepada paraturan Jabatan Imigresen Malaysia (bagi pelajar dari IPT luar negara).

10.0 PENGINAPAN

- 10.1 Penginapan asrama UTHM boleh ditawarkan bergantung kepada kekosongan tempat.
- 10.2 Yuran penginapan yang dikenakan tertakluk kepada kadar dan peraturan yang ditetapkan UTHM.
- 10.3 Pengecualian atau pengurangan yuran penginapan adalah tertakluk kepada kelulusan UTHM berdasarkan kriteria yang ditetapkan.

11.0 KELULUSAN PROGRAM MOBILITI

Semua Program Mobiliti perlu melalui proses kelulusan oleh UTHM berdasarkan kriteria yang ditetapkan.

12.0 PERKARA AM

- 12.1 Fakulti/ Pusat dan pelajar hendaklah memastikan tahap keselamatan bagi setiap aktiviti yang dijalankan berada dalam keadaan terbaik bagi

mengelakkan sebarang kecederaan dan kemalangan dan menghindari aktiviti berisiko tinggi bagi mengelakkan risiko kehilangan nyawa.

- 12.2 Semua pelajar yang mengikuti Program Mobiliti adalah tertakluk kepada peraturan UTHM dan IPT yang terlibat.
- 12.3 UTHM dan IPT yang terlibat berhak menamatkan tempoh program atau melaksanakan apa-apa tindakan yang bersesuaian termasuk menguatkuasakan tindakan undang-undang ke atas mana-mana pelajar yang didapati melanggar peraturan yang ditetapkan.

16.0 DOKUMEN RUJUKAN

Dasar Mobiliti Pelajar UTHM ini perlu dibaca bersama-sama sebarang peraturan dan dokumen yang berkaitan yang diguna pakai oleh Universiti dari semasa ke semasa.